

Ruka'm carta xutz'ib'aj ri Juan

Ri Juan kuya pan rutzil kiwach riglesia

¹Ri'in in nimalaj winaq, in aj wach re riglesia; kantz'ib'aj pan wa carta che alaq, ri alaq cha'tal ruma ri Dios, ri kamol ib' alaq pa rub'i' ri Qanimajawal Jesucristo.^a Paqatzij wi lik k'ax kannal' alaq, y na xew ta ri'in ma konoje ri kikojom ri Q'ijsaq re ri Dios k'ax kakinal' alaq. ²K'ax kaqana' alaq ruma ri Q'ijsaq qakojom junam uk' alaq y wa' na jinta utaqexik k'o quk' qonoje ri'oj.

³K'ola k'u uk' alaq y quk' ri'oj ri unimal rutzil k'u'xaj ruk' ri k'utub'al re ri rutzil k'u'xaj y ri utzil chomal re ri Qaqaw Dios y re ri Qanimajawal Jesucristo, Ruk'ajol ri Qaqaw. Kaqak'ul k'u ronoje wa' ruma e qakojom ri Q'ijsaq yey ruma qak'utum ri rutzil uk'u'x ri Dios chike ri tikawex.

Rutaqanik ri Dios puwi ri rutzil k'u'xaj

⁴Lik xinki'kotik ma xeb'enuriq jujun che alaq keb'in chi utz chupa ri Q'ijsaq jela' pacha' ri taqanik xqak'ul che ri Qaqaw. ⁵Ek'u wo'ora hermanos ri alaq utinamit ri Dios,^b kantz'onoj che alaq lik k'ax qana'a qib' chiqawach. Wa kan'ano na e ta pacha' kantz'ib'aj pan jun k'ak' tziypixab' che alaq, ma wa' e ri xex chi tom wi lo alaq. ⁶Ek'u ri rutzil qak'u'x kaq'alajinik echiri' kojb'in jela' pacha' ri kojutaq ri Dios che u'anik pa Rutzij Upixab'. Ek'u ri kojutaq che e wa': Qatijoj qib' che uk'utik ri rutzil k'u'xaj. Yey wa' xex chi tom wi lo alaq.

Mojsokotaj kuma ri e aj sokoso'nel

⁷Lik e k'i ri e aj sokoso'nel eb'enaq pa taq tinamit che ruwachulew, rike kakib'i'ij: «Na qatzij taj ri Qanimajawal

^a 1 Pa ri ch'a'tem griego kub'i'ij “che rixoq cha'talik y chike ri ralk'o'al”. E k'o ri kakich'ob'o “rixoq” e ke'elawi riglesia y “ri ralk'o'al” e ri hermanos re riglesia. ^b 5 “Utinamit ri Dios”: Pa ri ch'a'tem griego kub'i'ij “ixox”.

Jesucristo e Rucha'o'n lo ri Dios yey xu'an achi echiri' xk'un che ruwachulew» kecha'. Janipa ri jewa' kakib'i'ij, e sokoso'nel y eyaktajinaq chirij ri Cristo*. ⁸Chajij k'u ib' alaq cha' na kasokotaj ta alaq kuma rike; e masach alaq uwach ri rajil uk'axel ri chak ka'an alaq, cha' jela' tz'aqat uwach ri kak'ul alaq. ⁹E junoq kuya kan rub'e ri Dios y na katiki' ta chupa ri k'utunik re ri Cristo, ri' na jinta ri Dios ruk'. No'j ri katiki' chupa ri k'utunik re ri Cristo, ri' k'o ri Qaqaw Dios y k'o Ruk'ajol ri Dios ruk'. ¹⁰We k'o junoq kopon uk' alaq yey ri kuk'utu na e ta ri saqil k'utunik puwi ri Cristo, mak'ul alaq pa ocho alaq y mab'i'ij ne alaq che: «iUtzilaj k'unem!» ¹¹Ma e ri kab'i'n che: «iUtzilaj k'unem!» ri' e jun ruk' che u'anikil ri kichak na chom ta uwach.

K'isb'al uch'a'tem ri Juan che riglesia

¹²Lik k'i taq ri kuaj kantzijoj che alaq, pero wa' na kuaj taj kantz'ib'aj che alaq, ma ri kuaj ri'in e kinopon uk' alaq y jek'ula' kojch'a't chiqawach cha' junam kojki'kotik.

¹³Ri hermanos kimolom kib' wara,^c ri echa'tal ruma ri Dios, kakiya pan rutzil wach alaq. Amén*.

^c 13 Pa ri ch'a'tem griego kub'i'ij “ri ralk'o'al ri atzixel la”. Wa' e ke'elawi riglesia pa k'o wi ri Juan.